



Inatsisartuni ilaasortaq
Naaja H. Nathanielsen

INDGÅET

17 MAR. 2014

NAMMINERSORLUTIK OQARTUSSAT
GRØNLANDS SELVSTYRE
INATSISARTUT ALLATTOQARFIAT
BUREAU FOR INATSISARTUT
BOX 1060 - 3900 NUUK

Apeqqummut nr. 053-imut akissuteqaat

Asasara Naaja H. Nathanielsen

Inatsisartut Suleriaasianni § 37 naapertorlugu tallimanik Naalakkersuisunut
apeqquteqarputit.

Apeqqutitut nassiunneqartunut qujavunga, tassami apeqquternut akissuteqaatinni
Naalakkersuisut aatsitassanut suliassaqaarfimmi siunnerfii periusissaalu pillugit
erseqqissumik paasititsinissamut periarfissaqarlualerpunga.

Tulliuttuni apeqqutitit apeqquteqaat nr. 053/2014-imi tulleriinneri malillugit uingasumik
allassimapput.

Apeqqu 1

*Maannamiit ukiut aqqanillit aggersut ingerlaneranni qilleriviit marluk
qalluiffigilereersimanissaannik ilimasunneq tunngavigalugu aatsitassarsionermi
anigaasaateqarfiup 2060-mi 435 milliardinik imaqalerumaarsimanissaannik
naatsorsuinerup naleqquttuunera Naalakkersuisut aalajangiusimavaat?*

Apeqqu 1-imut akissut

Periusissami allassimavoq:

"Akileraartarnermut Atugarissaarnermullu ataatsimiititaliap isumaliutissiisutaani
tamatumani saniatigut uuliamik tunisassiornermit isertitassaalersinnaasut
missiliuiffigineqarput. Naatsorsuinerit naatsorsueriaatsimik tunngaveqartumik
suliarineqarput, 2020-mi uuliasiorfimmi nappartanik 500 mio.-inik annertussusilimmik
qalluiffiusussami qillerinermi suliffimmik mikisumik pilersitsineq aallartinneqassasoq,
aamma 2025-mi uuliasiorfimmi nappartanik 2 mia.-inik uuliamik qalluiffiusussami
qillerinermi suliffimmik angisuumik inerisaaneq aallartissasoq. Ataatsimoortumik
tapiissutit annikillineqarnerannut, anigaasaateqarfimmit ernianit pissarsiaassanut il.il.
taarsiissutissanik anigaasaateqarfimmit anigaasanik tigusinissaq tunngavigalugu
naliliisoqarpoq, anigaasaateqarfik 2060-imi 435 mia. koruuninit amerlanerusunik
katersukkanik pigisaqalersimassasoq.

Kisitsisit taakkua erseqqissumik takutippaat aatsitassanut suliassaqaarfik Kalaallit
Nunaata anigaasaqarneranut neriulluarnartorujussuarmik pingaaruteqalersinnaasooq.
Taamaattoq suliassaqaarfiup piffissap ingerlanerani inuiaqatigiinni anigaasaqarnermi

13. marts 2013
Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: isiin@nanoq.gl
www.nanoq.gl

patajaatsumik sunniinissaanik qulakkeerisumik ineriartortinneqarnissaa pingaaruteqarpoq. Taamaattoqassappat suliassaqarfimmi ingerlatat aalajangersimasumik annertussuseqarnissaat pisariaqarpoq.”.

Taamaalilluni allassimavoq naatsorsueriaatsimi teknikkimut assersuutit, Akileraartarnermut Atugarissaarnermullu ataatsimiititaliap isumaliutissiissutaata naammassineqarnissaa sioqqullugu sularineqartut, tassani pineqartut.

Naatsorsuinermit ilassutaasut PricewaterhouseCoopers-imit (PwC), nunarsuarmi 180.000-it sinnerlugit sulisoqarluni aammalu nunani 157-imi ingerlataqarluni nunarsuarmi kukkunersuiisartut siunnersortillu suliffeqarfinit annersaasunut ilaasumit, sularineqarput. 2013-imi suliffeqarfik nunarsuaq tamakkerlugu 32,1 mia. amerikamiut dollariinik kaaviiartitaqarpoq, Danmarkimi kaaviiartitai 1,865 mia. danskit koruuniinik annertussuseqarlutik. Ingerlatseqatigiiffik suliassaqarfimmi piginnaasaqarnerminut nunani tamalaani iluarisaavoq, aammalu Naalackersuisut PwC-p imaluunniit Akileraartarnermut Atugarissaarnermullu ataatsimiititaliap piginnaaneqarnerinut nalornissuteqarnissamut pissutissaqanngillat. Taamaattumik Akileraartarnermut Atugarissaarnermullu ataatsimiititaliap nalunaarusiaanit (siusinnerusukkut Naalackersuisuusut suliakkiissuteqarneranni sularineqartoq) naatsorsuinermit assersuutitut innersuussinissaq tulluorsorineqarpoq. Naatsorsuinermit assersuutini aatsitassarsiornermut periarfissanut ilusiliat qanoq Kalaallit Nunaanni aningaasaqarnerup ineriartorneranut sunniisinnaanersut pillugu immikkoortoq ataaseq ilaatinneqarpoq. Naalackersuisut suliassaqarfimmi taakkunanani anguniagaat siunissamut ungasissumut tunggapput, tamannalu aamma periusissami allassimavoq:

”Kalaallit Nunaanni aningaasaqarnermut ataavartussamik tunngavissiiinissaq qulakkeerniarlugu siunissamut ungasissumut siunnerfigineqarpoq, aatsitassarsiorfiit tallimat imaluunniit quliussasut aamma minnerpaamik uuliasiorfiit marluk tunisassiussasut”.

Apeqqu 2

Kikkut 2025-mi qilleriviit marluk qalluiffigilersimanissaannik takorluuineq suliareqqaarpaat? Pricewaterhousecoopers (PWC)-ip imaluunniit taamani Aatsitassanut Pisortaqarfiusup?

Apeqqu 2-imut akissut

Kukkunersuiisartut suliffeqarfiat PwC iluarisaasoq 2010-imi uuliasiorfiit marluk matuma siuliani taaneqartut annertussuseqartut aallartinneqassagaluarpata isertitassat suut pissarsiarineqarsinnaanersut missiliueqqullugu, taamanikkut Aatsitassanut Ikummatissanullu Pisortaqarfiusup qinnuigaa.

Apeqqu 3

Naalackersuisut isumaqarpat ukiut arfiniliinnaat qaangiuppata uuliaqarfimmi ataatsimi qalluilereersimasoqarnissaa ilimanavissoq?

Apeqquut 3-imut akissut

Apeqquut 1-imut akissuteqaat innersuussutigineqarpoq, tassani allassimavoq siunissamut ungasissumut siunnerfiit pineqartut.

Apeqquut 4

Nunaoilip uuliasiornermi akuersissutinik piginneqataassuteqarluni peqataanera Naalakkersuisut 6,25%-imut affaannanngortippaat. Kisianni Nunaoilip qalluinermi 12,5%-imik peqataanera PWC-ikkut naatsorsuineranni tunngavigineqarpoq. Suna pillugu Naalakkersuisut periusissiaminnut naatsorsuinertaanik allanngortisiffigalugulu atorunnaarsitsiffigeqqammisaminnut naatsorsuineq ilannguppaat?

Apeqquut 4-imut akissut

Periusissami allassimavoq:

"Maannakkut akileraarusiisarnermut ilusiliami allannguuteqartitsisoqassappat taamaallaat taanna piffissami periusissap atuuffissaani pisussamut tunngassaaq, tassalu 2014-imiit tamatuma kingornanut. Misissuinissamut qalluinissamullu akuersissutit maannakkorpiaq tunniunneqareersut sinneqartoorutinit royaltymik aamma naalagaaffiup peqataanissaanut aalajangersakkanik imaqareerput, taamaattumillu imaaliallaannarlutik allanngortinneqarsinnaassanatik".

Tamatuma saniatigut PwC-ip nunanik sanilliusilluni nalilersueqqissaarnerata takutippaa government take-t maannamut ilusiliami aammalu ilusiliami nutaami imminnut qanittuararsuusut.

Apeqquut 5

Ullumikkut akuersissutinik tamarmiusunit uuliasiornermi akuersissutit qassit ingerlatseqatigiiffinnit ataatsimut kattussimasunit pigineqarpat? Naalakkersuisut isumaqarpat akuersissutit uuliasiorfiutileqatigiiffinnit ataasiinnaanngitsunit pigineqartarnerat qaqutigoortuusooq?

Apeqquut 5-imut akissut

Ikummatissiassanut suliasaqarfimmuut akuersissummi ingerlatseqatigiiffimmit ataatsimit amerlanerusut tamatigut ilaasarput, pissutigalugu akuersissutit tamarmik minnerpaamik uuliasiorfiutileqatigiiffimmit ataatsimit suliaqartuunissamik akisussaaffeqartumit aamma Nunaoil A/S-imit misissuineranut immikkoortumi akiliunneqarluni suleqataasartumit pigineqartarmata. Maannamut neqeroortitsinerni kiisalu matu ammaassisoqarfinnut periaatsimi Naalakkersuisut piunasaqaataannut ilaasarpoq, uuliasiorfiutileqatigiiffiit kisimiillutik imaluunniit ingerlatseqatigiiffinnik allanik suleqateqarlutik pisinnaatitsissuteqarfissanut qinnuteqarsinnaasut. Naalakkersuisut paasinninnerat malillugu, Kalaallit Nunaanni sumiiffinni taamatullu nunarsuarmi sumiiffinni allani pisinnaatitsissuteqarfissat uuliasiorfiutileqatigiiffinnit ataatsimoortunit pigineqartarnerat qaqutigoortuunngilluinnarpoq. Ullumikkut pisinnaatitsissuteqarfissat uuliasiorfiutileqatigiiffinnut tunniunneqarsimasut 22-iupput. Taakkunanga pisinnaatitsissuteqarfissat 13-it ingerlatseqatigiiffinnut ataasiakkaanut (Nunaoil

misissuinnermut immikkoortumi akiliunneqarluni suleqataalluni) tunniunneqarsimapput
aammalu piginnaatitsissuteqarfissat 9-it ingerlatseqatigiiffinnut ataatsimoortunut
(Nunaoil misissuinnermut immikkoortumi akiliunneqarluni suleqataalluni)
tunniunneqarsimallutik.

Inussiarnersumik inuulluaqqusillunga



Jens-Erik Kirkegaard